

– Ի՞նչ պետք է անել, օրհնած: Մարդս մի անգամ է աշխարհ եկել, մի անգամ էլ պետք է մեռնի, էլ մեռայ անգամաշխարհի հոյ չէ գալու: Ուրեմն, քանի կենդանի է, պետք է ուտել, խմել, զոարճանայ, որովհետեւ իր դատածը գերեզման չէ տանելու:

Թաղական խորհրդի անդամի փիլիսոփայութեանը պատասխանեց իմ մօտ նստող արհեստաւորը:

– Թող զահրումար ուտել, դրանից անելի լաւ է: Այդ անպիտանը տասն տարուց անելի, ջրի տիկն ուսից քարչ գցած, բոբիկ ոտներով թափառում էր Պոլսի փողոցներում եւ բաժակներով ջուր էր ծախում: Ընտանիքը տանը ուտելու հաց չունէր: Հիմա մի քանի փարայ է բերել եւ այդպէս վատնում է: Մի քանի օրից յետոյ բերածը կը հատնի, դարձեալ պարտք կանել, դարձեալ կը գնայ Պոլիս եւ կրկին ջրի տիկը քարչ կը տայ ուսից: Իսկ ընտանիքը այստեղ կթողնէ քաղցած:

– Պոլսի փողոցներում բաժակներով ջուր ծախողը միթէ՞ այստեղ աղա է դառնում, – հարցրի ես զարմանալով:

– Այո, պարոն, – պատասխանեց դարձեալ արհեստաւորը: – Մեր քաղաքում ով որ գրպանում մի քանի դուրուշ ունի, նա աղա է, չնայելով, թէ այդ դուրուշները նա ինչ ցածուրթեամբ է վաստակել:

Անցաւ մի այլ խումբ: Առողջամիտ արհեստաւորը, ձեռքը մեկնելով դէպի մի վայելչակազմ երիտասարդ, ասաց.

– Ահա մի ուրիշ աղա էլ. դա էլ նոր է եկել. Պոլսում քիսաջի էր, այսինքն բաղանիքներում ծառայող: Պետք է Պոլսի անբարոյական բաղանիքները տեսած լինել, պետք է նրանց գաղտնիքներին տեղեակ լինել, որ կարելի լինի հասկանալ, թէ որքա՞ն ստոր եւ անամօթ ծառայութիւն է կատարում քիսաջին: Այստեղ մի լաւ ընտանիքից աղջիկ եւ տալիս այդ քիսաջուն, այդ աղային: Շուտով հարսանիք պիտի անել: Պոլսից փողերը կծախսէ, կրկին պարտքերի տակ կընկնի եւ, մի քանի ամսից յետոյ, խեղճ կնոջը անտեր թողնելով, կրկին կը գնայ Պոլիս, կրկին կմտնէ բաղանիքը:

Հեռոյից երեւաց տեր Եղիշէն:

– «Ֆարմասունը» գալիս է, – ասացին միմեանց երեցփոխանը եւ թաղական խորհրդի անդամը:

– Ի՞նչ է «Ֆարմասուն», – հարցրի ես:

– Անհաւատ մարդ է, – պատասխանեց երեցփոխանը: – Դա մեր թաղում աղջիկների դպրոց էր բաց արել, հաւաքեցանք, քանդեցինք: